

ივერიის ღვთისმშობლის ხატის სახელობის ტაძარი 10 წლისაა



29 სექტემბერს ივერიის ღვთისმშობლის ხატის დღესასწაულზე საზეიმო წირვა შესრულდა ვარკეთილის ივერიის ღვთისმშობლის ხატის ეკლესიაში, რომელიც 10 წლის წინ სრულიად საქართველოს კათოლიკოს-პატრიარქის ლოცვა-კურთხევით ახალციხისა და ტაო-კლარჯეთის მიტროპოლიტმა თეოდორემ (ჭუაძე) აკურთხა. ამ საიუბილეო თარიღთან დაკავშირებით ტაძრის წინამძღვარმა, დეკანოზმა იაკობმა (უშიკიშვილი) მოწვეულ სამღვდელოებასთან ერთად სადღესასწაულო წირვა აღასრულა.

წირვის შემდეგ მისი უწმინდესობის ლოცვა-კურთხევით, წალკელმა ეპისკოპოსმა გრიგოლმა (კაცია) ღვთისმშობლის პარაკლისი გადაიხადა, დალოცა მრევლი და მიულოცა ტაძრის დღესასწაული.

აღსანიშნავია, რომ ამ ტაძართან არსებობს უპოვართა სატრაპეზო, რომელსაც 500-ზე მეტი სხვადასხვა ეროვნებისა და აღმსარებლობის ბენეფიციარი ჰყავს. აქვე ფუნქციონირებს საკვირაო სკოლა, რომელშიც 180-ზე მეტი ბავშვი სწავლობს გალობას,

სიმღერას, ფერწერას, ხატწერას, ქარგვას, ხეზე კვეთას და საღვთო სჯულს. ახლო მომავალში გაიხსნება 12000 წიგნზე გათვლილი ბიბლიოთეკაც და ყველა მსურველს შეეძლება ისარგებლოს მისთვის სასურველი წიგნით და გაიმდიდროს ცოდნა.

- patriarchate.ge